

ձանադրութիւններ ժ.Բ. դարից :

Դեռ աւելի․ նոյն պատմագիրը, ինչպէս նաեւ Սէրգէյ Գլինկան բերում են ուրիշ բազմաթիւ փաստեր եւս, որոնք անհերքելիօրէն ապացուցանում են, որ շատ կանուխ ժամանակներից հայերը կարեւոր մասնակցութիւն են ունեցել Ռուսաստանի վաճառականութեան մէջ : «Խօլբարական մայրաքաղաքում — ասում է Կարամզինը — հայ վաճառականները փոխանակում էին ռուսական մորթիներն ու կաշիները պարսկական եւ ուրիշ ապրանքների հետ»¹⁾ :

Հայ առեւտրականների նշանակութիւնը Ռուսաստանում աւելի է բարձրանում մանաւանդ այն ժամանակներից, երբ սկսում է կազմակերպուել բուն ռուսական պետութիւնը, այն է՝ Կիւեւի մեծ իշխանների օրերից : Նրանք, Կիւեւի մեծ իշխանները, թանգ զնահատելով հայ վաճառականների դերը Ռուսաստանի տընտեսական յառաջադիմութեան ասպարէզում, զանազան արտօնութիւններ էին շնորհում նրանց : Իսկ առեւտրը սիրում է ազատութիւնն եւ զարգանում է այնտեղ, ուր այդ ազատութիւնը նա ունի :

Եւ հայ վաճառականները շքանշաններ էին Ռուսաստանն ու այնտեղ հաստատում :

ԺԱ. դարում հայերի թիւն ու ազդեցութիւնը Ռուսաստանում արդէն այնքան մեծ էր, որ ո՛չ միայն իշխանական պալատներում հայ բժիշկներն ու պաշտօնեաները կարեւոր դեր էին կատարում, այլ եւ հայերն ունէին իրենց քարաչէն եկեղեցին Կիւեւում եւ ընդարձակ հողերն ու կալուածները զանազան տեղերում :

Հայ վաճառականների դիրքը Ռուսաստանում է՛լ աւելի է զօրանում յատկապէս Ռոմանովների օրով : Ռոմանովեան տան բոլոր լուսամիտ միապետները խրախուսում էին հայ վաճառականներին եւ ամէն կերպ հովանաւորում : Այսպէս, դեռ 1626 թուից, Ռոմանովեան հարստութեան հիմնադրի օրերից, հայ վաճառականները երկար ժամանակ գտնուում էին

կառավարութեան հովանաւորութեան ներքոյ եւ նրա պաշտպանութեամբ իրենց գործերը վարում :

Կրկնում ենք՝ հայ վաճառականները, շատ վաղ ժամանակներից հետէ, առեւտրական յարաբերութիւններ ունէին Ռուսաստանի հետ․ բայց հայ ժողովուրդը, բացի Յակովբ Զուլաթեցու այն մէկ հատիկ զէպքից, քաղաքական սրեւէ ծրագիր կամ նպատակ Ռուսաստանի հետ կապուած՝ դեռ չէր ունեցել :

2.

Հայերի քաղաքական յարաբերութիւնները Ռուսաստանի հետ ծրագրօրէն եւ հետեւողականօրէն սկսւում են Պետրոս Մեծի օրերից : Ուրիշ խօսքով՝ 18-րդ դարի սկզբներից հայ քաղաքական միտքը երես է դարձնում Արեւմուտքից եւ որդեգրում է ռուսական օրինակներն, որը — կարելի է ասել — դեռ մինչեւ այսօր էլ հայ ժողովուրդի գէթ մի խոշոր մասի համար քաղաքական դաւանանքի հիմք է կազմում :

Ինչպէս գիտենք, Ռուսաստանը վաղուց ի վեր, դեռ այն ժամանակներին, երբ նա տակաւին իր բնական-ազգայրական սահմանների մէջ էր ամփոփուած, ձգտում էր զէպի Կասպից ծովը : Դրա պատճառը մասամբ աշխարհակալական էր, բայց աւելի՛ տնտեսական-առեւտրական : Ռուսական առեւտրի եւ արդիւնաբերութեան զարգացման տեսակէտից՝ մէկ հրամայական անհրաժեշտութիւն էր Կասպից ծովի դրաւումը կամ «ռուսականացումը» :

Այդ քաղաքականութեան ամենացայտուն ներկայացուցիչը հանդիսացաւ Պետրոս Մեծը :

Հասկանալի է, որ ռուսական շահերը պահանջում էին ամէն կերպ պաշտպանել ու սիրաշահել Կովկասի երկու քրիստոնեայ ժողովուրդներին — հայերին ու վրացիներին — որնոց աշակցութիւնը այս գործում չափազանց կարեւոր էր Ռուսաստանի համար :

Ու հետաւեա Պետրոս Մեծը անմիջապէս իր հայեացքն ուղղեց զէպի հարաւ եւ յատուկ ուշադրութիւն դարձրեց այդ երկու ժողովուրդների վրայ : Նա ամէն կերպ աշխատում էր կապել նրանց Ռուսաստանի հետ, անգամ ազատագրութիւն խոստանալով մահմեդական լրծից :

1) Կարամզին, «Պատմութիւն ռուսական թագաւորութեան», III. եր. 206. Ս. Գլինկա, «Էջեր հայ ժողովուրդի պատմութենէն». մեր յօդուածը՝ «Մէկ նշանաւոր հարիւրամեակ», «Հ.», 1929 :